

Mokanda nwa Polo oka Bakolose Maphoo ma etatele

Polo akomaka mokanda mumu imbele sabaka yo o boloko. Yo taikaka eba baanosi ba Kolose. Moto owa baebaka eli nde nwebi ne Epafras moto owaimolaka Simo Elaa omo. Emba amba yaimola Polo obokye batati inyangola masimo masuu manyakune onte ya baanosi. Babateya obokye: Pho ya iyeba Nwaphongo, esengyesi obokye bato bakumole na boikye malobo mabangye bee «Bakonzi ba ikolo na munse», bambe kula na mibele na ikumola mibeko ndengye na ndengye mikyekyi ntoma.

O etee eya ntubo, Polo aphe Nwaphongo melasi pho ya ndengye eyalobikya Klisto. Yo alekyi malobo miso, eli nde yo oli mokonzi nwa Ingomba (1.3-2.3). O etee eya ibale, Polo kaongye na baanosi obokye bakyebe na mateya ma boole (2.4-25). Asokya na iteya mobesi mowa molongoba na bato ba Klisto na ba Ingomba. Ebe onte ya mabota naa onte ya mokyisi. Bobele amba beya baanosi (3-4).

Mateya maa boole matokolo imbele siso. Nabo mawenene ndokolo mali nde manyakune, mango maso mabende bato pho bamanya maunya ma bee oka Klisto. Nzuka eli nde yo oli munene, yo moto owa manya bato o boombo bosu.

Maphoo mali o mokanda mumu:

- Bakolose 1.1-8: Ibeya

- Bakolose 1.9–2.19: Klisto ali nza na etoma ye eli iye?
- Bakolose 2.20–4.6: Bomoo boonyakune onte ya Klisto
- Bakolose 4.7-18: Ndongolo

Ibeya

¹ Inga Polo, nali toma ya Yesu Klisto bo wazinga Nwaphongo. Nga na nwebi na banga Timote,

² toekomele mokanda mumu, b̄εε basantu baa Kolose, baakolo b̄ebi na banga onte ya Klisto. Le obokye ngolu na b̄ose ikyiute oka Ango wa banga Nwaphongo ibee na b̄εε.

Polo kaphε Nwaphongo m̄lesi

³ Tophe Nwaphongo, Ango wa Nkolo wa banga Yesu Klisto m̄lesi pho ya b̄εε o mabondesi ma banga ma nkolo iso.

⁴ Tooka simo ya ianola sa b̄εε oka Yesu Klisto, na pho ya lozingo looli na b̄εε oka basantu baso,

⁵ na molemo ηwa b̄εε mi yaebongyisela Nwaphongo o ikolo. Molemo ηwaokaka b̄εε phanza o nzela ya Iloba saa phele, sili Simo Elaa.

⁶ Simo mε Elaa eyakomaka nono oka b̄εε, eenyango o munse munso, kyeembe na bota mbuma ikyikole nde bowa kyela yango onte ya b̄εε, tata mokolo ηwaokaka b̄εε na ηwa ebaka b̄εε na phele ngolu ya Nwaphongo.

⁷ Ikokana na mateya maephεkyε Epafras, ekamba ya banga na nwebi wa etoma, owakyla etoma pho ya b̄εε ndokolo owaakolo moto wa etoma wa Klisto.

⁸ Aloimola ndengye ya lozingo laephε Bolobō.

⁹ Yango mena, o mopha ηwaka banga, tata mokolo ηwa looka banga, toloole ibondede pho ya bεε. Toongye na Nwaphongo obokye aephe saakolo zebi na malondo maute na Bolobo phe.

¹⁰ Na bomo, wambabika bookozingye Nwaphongo, waamba na kyela iso ikyimophe nkyisa. Wamokyela na maphoo maso mabote mbuma iinda, wamba na kola na iyeba Nwaphongo sakolo iyeba.

¹¹ Bamoekuya o maphoo maso na mwiya ηwa nkyemo ye, emba na bomo wamokoma na ilendendala na ná ikanga motema o bimekyi biso.

Zembo pho ya Klisto ooli mokonzi ηwa ikolo na munse

¹² Na nkyisa, phe Tata melesi, pho eli yo owakyela bokye ozwe na bεε iyalo o ilaka sa basantu onte ya moo.

¹³ Alomanya o bokonzi pha enzombi, amba lobuya o bokonzi pha Nwana we wa lozingo.

¹⁴ Onte ye tokando, masumu ma banga malimbisami.

¹⁵ Ali elalaa ya Nwaphongo otowenene, Mwana owa soo onte ya bikyelamo biso,

¹⁶ pho iso yakyelama onte ye,

o ikolo na o se,

bikyelamo biwenene na biteebiwenene,

ebe na phembo iso ikiyangyele mokyisi ηwa enzombi,

iso yakyelamaka nde ne na pho ye.

¹⁷ Emba iyo ali o soo pha maphoo maso, iso ili nde pho ye,

18 emba iyo alii moto nwa nzoto, nzoto me eli Ingomba.

Ali etatele,
Nwana owa boo onte ya bawe,
pho afe o maphoo maso moto wa boo.

19 Pho Nwaphongo asepela
imizasa mobimba nwe munsu onte ya Klisto.

20 Na nzela ye, na pho ye, Nwaphongo abongya
na pho iso.

Na nzela ya malongo maasweya nwana we o
ekulusu, Nwaphongo abuya bose ebe na
ose ebe na o ikolo.

21 Emba bee baabaka phanza babutu, bee
baabaka na bitoma bibe baweniyaka bonguna
bookusi na Nwaphongo,

22 kyeka obokye unwanwa eye Nwaphongo
abongya pho ya nzoto ya Nwana, na iwa se, pho
ya eweninya o boo phe basantu, sa mooya na sa
intono.

23 Kasi esengyesi obokye, na ianola, ophile na
bokusi bee sakatusa, samana o molemo nwa
Simo Elaa eya okaka bee, eya imolaka bee
bikyelamo biso bili o mokyisi, emba inga Polo,
nabuto moto wa etoma pho yaimola Simo me
Elaa.

Ebasi ya Polo

24 Unwanwe eye nali na nkyisa onte ya malosi
maokye nga pho ya bee. Na nzoto ya nga,
nakokya malosi ma Klisto mata baa o nzoto ye
ili Ingomba.

25 Nabuto moto wa etoma wa Ingomba,
kokokana na etoma eyampe Nwaphongo pho

ya b̀eε. Etoma me eli iunva iyimola Ilofa sa Nwaphongo,

²⁶ sekyele eyabombama minyabipha emba Nwaphongo aeweninye unwanwa oka basantu b̀e.

²⁷ Azingaka ibateya ezwele na nkyemo ya sekyele eyabombama me onte ya bapakano. Klisto ali onte ya b̀eε, molemo nwa nkyemo!

²⁸ Eli yo okoimole banga. Toimole moto munsɔ, toteya na moto munsɔ na zebi sisɔ, phɔ ya ibuya moto munsɔ moto olongoɔa onte ya Klisto.

²⁹ Yango eli ntina ya etoma ekyenwane na nga, ya ebasi ekye kambe nga na bokusi pha Klisto bookyele na mwiya onte ya nga.

2

¹ Phɔ nazingye obokye b̀eε oebe ebasi ye ekusi ekyenwane nga phɔ ya b̀eε, phɔ ya ba Laodikiya, na phɔ ya basuu baikye bate baika na nvene nga mampenza.

² Nazingye obokye na bomɔ, mandondo ma b̀eε malenzame na laakolo lozingo, bazwe ezwele ye esɔ, na saakolo iyeba, na iyeba sekyele ya Nwaphongo eli Klisto.

³ Ezwele esɔ ya zebi na ya boebi ya bombama onte ye.

⁴ Nawɔ babona phɔ obokye moto sayaekosa na molɛte nwa iwɔɔ.

⁵ Nabo na nzoto sili onte ya b̀eε, kasi na bolɔɔ nali na b̀eε, nali na nkyisa ya ieyeba obokye ophisi bitemi ba b̀eε na bokusi pha ianola sa b̀eε oka Klisto.

Phakolo bomɔɔ boute nde na Klisto

⁶ Bèè waanola Yesu Klisto ifa Nkolo ya bèè, yango mena bèè ikala nde ifenga nzela ye.

⁷ Nyosa ne nkanga ophikame nde mi yo. Obe na ná ianola sikusi bo waeteyaka be, emba ophেকে Nwaphongo melesi imbele sisó.

⁸ Okyebe obokye moto na monomó saebisa o izengye sa zebi sa bomoto siiwenene ndokolo eli makolo malondo nzuka eli nde mateya maute na bato. Iso miina kyiute na phembo ya mokyisi kasi na Klisto phe.

⁹ Pho mobimba musó nwa Nwaphongo mozasi o nzoto ya Klisto.

¹⁰ Emba ooli bèè onte ya Klisto, otondi na phaakolo bomó. Yo ali oikolo sa phembo iso.

¹¹ Baebelékye nde onte ya Klisto. Ifele me teli sikyelame na nsee ya bato, simanya béé etee ya nzoto kasi eli ifele saaka Klisto.*

¹² Pho waabatisamaka bèè, yabaka ndokolo wakundamaka ne molongó monomó. Wamba kula kundwa ne molongó o nzela ya ianola siili na bèè mi phembo ya Nwaphongo, owamokundola onte ya bawe.

¹³ Bèè babaka phanza bawe pho ya bobé pha bèè na wataka ba bèè ngbotu, akuli ebuya na bomó molongó ne. Alolimbisa bobé pha banga bosó.

¹⁴ Aziminye mobeko mwa baka molophunde, amolemó na imobakya o ekulusu.

¹⁵ Nwaphongo amanya mwiya nwa phembo iso, aiphe só omiyo ma bato basó na bowa

* **2:11 2.11** Ifele sa ka yesu Klisto sili obokye kamanya mobesi nwa moto mokasi nwaa masumu.

ilonga Nwana we o ekulusu.

¹⁶ Boebe babona moto saeyoya pho ya ntoma naa pho ya maleku naa pho ya eseleko naa pho ya bokombe pha sika, naa pho ya sabata.

¹⁷ Iso mina ili nde elalaa ya maphoo mamoya, kasi lona lakolo lowoo eli nde Klisto.

¹⁸ Moto monomo saeiya. Bee bakumisa na imiuya sa boole, baasambeke banze, baaumunya nde maphoo mawene bee ondoto, bato me bali na maumunya nde ma bomoto, me maabaphe mawala.

¹⁹ Be, tebaangane na Klisto, ooli moto. Ka eli nde moto moophe nzoto iso ieyengyesi na yango obokye mantonga na nsoti ibee elele yonyo. Emba eli Nwaphongo okokosa ina nzoto.

²⁰ Bo umbo waa na Klisto molongo ombi na mana o boombo pha maphoo ma mokyisi mumu, pho ya'ye koanole ukula kyelela mibeko ndokolo bomoo pha bee botabaa nde o maphoo ma mokyisi mumu?

²¹ Sakpa! Sameka! Sakuma!

²² Eso meena eli nde maphoo maamotono bo moto kamakyelele. Mena eli mibeko na mateya maaute na bato!

²³ Maphoo me mawenene bina ndokolo maphoo maa zebi, matome moto isambela na bokusi pho ye mampenza, imiuya, na imba miweninya bolosi. Kasi mibeko me temili na ntina pho mikokya nde maphowa ma bomoto.

3

¹ Bo waakwa bee na Klisto, luka mbolo ili o ikolo, wazasi Klisto o eboko ya boloo ya

Nwaphongo.

² Umunyaka maphoo mali o ikolo, kasi maa munse phe.

³ Bèè waawa, na bomoo, emba bomoo pha bèè pha mibomba na Klisto, onte ya Nwaphongo.

⁴ Pho Klisto ali phaakolo bomoo pha bèè, na bèè me, wamowenene nte onte ya nkyemo ye.

Moto oomokasi na moto oomunyakune

⁵ Na bomoo, ole bitoma biibe ba bèè ba mokyisi: Bondumba, sokoto, phowa ya nzoto, looto, pho looto eli isambela bikyeko.

⁶ Kyeka maphoo maabangye yo ya Nwaphongo.

⁷ Phanza wataaka ba bèè o maphoo mama, mobesi njwa bèè njwabaka bomoo me.

⁸ Ujwanjwa eye, na bèè me, omanyanya maphoo maso maama: Yoo, itombo, kabu, bitoo, maloba maso mabe me satokolo o noko ya bèè.

⁹ Sa katelana onte ya bèè pho wamanya moto oomokasi na maphoo mabaka yo kakyele.

¹⁰ Emba bèè olati moto omunyakune, iyo oobuto na phakolo boebi boomulinya na elala ya Nwaphongo wamokyela.

¹¹ Ujwanjwa, tewakuli ba Baela naa Bayuda, bato babele bée naa bato ba teika bele be, babutu, moto owatanga, moombo, moto wa somi, tebali na bokyese. Kasi Klisto ali maphoo maso na ali na o iso.

¹² Pho bée oli baaolo Nwaphongo, basantu bée bazinga yo, olate ndondo ya ngolu, ndondo elaa, ndondo ya imiuya, bonyile, na ikanga motema.

13 Ndekokuyane onte ya b̀̀e, bo nwebi akyesi bofe olimbisane onte ya b̀̀e. Bo waelimbisa Nkolo ya banga, na b̀̀e okyele nde bomo me

14 Emba epkele elekysi ntina eli, ilata lozingo: Bookyesi bomoo, wamoba b̀̀e baso elele yoooyo na na ndondo yoooyo.

15 Le obokye bose boephe Klisto, bokonza mandondo ma b̀̀e, pho obokye Nwaphongo aebanga pho obokye obe b̀̀e baso nzoto yoooyo, ndekomophe melesi mbala na mbala me.

16 Le obokye Iloba sa Klisto na ezwele ya sango sizwe eziye onte ya be. Oteyanakye, ombakye na kyebisana na zebi siso siikokyi. O mandondo ma b̀̀e, tubela Nwaphongo membo ma imophe melesi, omokumole na membo masuu maute na Bolobo.

17 Iso iikokyi b̀̀e iwo naa ikyela, oikyele na nkombo ya Nkolo Yesu, na iphe Tata Nwaphongo melesi na nzela ye.

Mozalesi nwa ibota

18 Basi, ndekomuiya obo pha bampela ba b̀̀e, ndengye ekokyi o miyo ma Nkolo.

19 Bampela, zingaka basi ba b̀̀e, saphinyoaka na b̀̀e.

20 Bana, kumolaka baboti babe na maphoo maso, kyeka maphoo mazingye Nkolo oka b̀̀e.

21 Batata, satombiyaka bana babe, pho b̀̀e sabaa na ngongo.

22 Baombo, kumolaka bakolo ba b̀̀e ba wawa o se o maphoo maso. Sa bakumolaka nde o miyo ma be, bokokyele bato baayoko obokye

baabasambakye. Kasi obakumole na motema monomō ya bato baalote Nkolo.

²³ Na bo kokyele etoma ye, oekyele na ndondo elaa, ndokolo koekyelele Nkolo kasi bato phe.

²⁴ Eba obokye, Nkolo amoephe ilaka ndokolo mbano. Nkolo okokyelele b̄e eli Klisto.

²⁵ Moto okokyele bofe amozwa etumbu na bofe bokyele yo. Pho Nwaphongo tali na mbelekye.

4

¹ B̄e bankolo, baka na baombo ba b̄e na bosembo na ná phele, eba obokye na b̄e me, oli na Nkolo monomō o ikolo.

Maphō ma isōkya

² Baka na etungu ya ibondelē, obakye na ná bokyengyi pha iphekye Nwaphongo melesi.

³ Bondelēkye na pho ya banga obokye Nwaphongo alozibolele mozibo nwa iimola Simo ye. Na bomō, na moimula sekyele ya Klisto enyōlesi nga o boloko.

⁴ Le obokye na eimole mboka eso bokokyi nga ieyimola.

⁵ Ndekomitambusa na bosembo o miyo ma bato batebali baklisto. Kyelaka babona imbele siso sizwe b̄e nkonzō ya ibaa na be.

⁶ Le obokye mowōsi nwa b̄e mobakye na lelele bo ya mokpa, baka na yela yaibusisa moto munsō na ndegye ekokyi.

⁷ O maphō mankyekyi, wamozwa masimo maso maanyakune na Tishike, nwebi na nga

okozingye nga, yo owakolo moto wa etoma, ooli ekamba ya nga o etoma ya Nkolo.

⁸ Na etomesi yo nde pho aya eyimole masimo ma banga, ambe na lenza mandondo ma b̄εε.

⁹ Namotomi yo na Onezime, owakolo nwebi okozingye banga, auta nde oka b̄εε oomɔ. B̄εε bamoeyimola maphɔɔ masɔ malekane wawa.

¹⁰ Nwebi na nga wa boloko Aristarke, aelongosi, na Malako, ηwana nyango na Balanabasi. Ombo zwa mateya pho ye: Bo akomi oka bε, omoyambe na bola.

¹¹ Yesu ookobangye b̄εε Yusitu aelongosi mε. Onte ya Bayuda eli nde b̄εε bakyela na nga etoma pho ya bokonzi pha Nwaphongo, baabaka banzuya mɔɔ.

¹² Epafras owauta oka b̄εε aelongosi. Yo moto wa etoma wa Yesu Klisto oototwe ibɔndele pho ya b̄εε obokye otεmε nzi, ombakye na kyela maphɔɔ masɔ maali o phowa ya Nwaphongo.

¹³ Nga nali nzoka ya bokowεne yo bolosi boikye ya b̄εε, na pho ya baanosi ba Laodikiya na Ba Ierapolis.

¹⁴ Luka, nwebi na banga owa muunganga na Demasi baelongosi.

¹⁵ Olongoloko bεbi bali o Laodikiya, na Nimifa na ingomba siangane o ingambi sε.

¹⁶ Bo otangyi mokanda mumu waumbo, omotomele ingomba sa Laodikiya bamotangye mε. Na b̄εε otangye mokanda ηwa motoma nga o Laodikiya.

¹⁷ Pho ya isokya, wɔ na Alisipe obokye: Ndekoebe na etoma eephe Nkolo, oekyele na

bolaa.

¹⁸ Eye molongolo mookomi nga Polo na maboko manga mampenza, bèe sabunga obokye nali o boloko.

Le obokye ngolu ya Nwaphongo ebe na bèe!

Lobala NT

Lobala: Sangola Eenyakune New Testament

copyright © 2018 Wycliffe Bible Translators, Inc.

Language: (Lobala)

Contributor: Wycliffe Bible Translators, Inc.

All rights reserved.

2025-05-10

PDF generated using Haiola and XeLaTeX on 10 May 2025 from source files dated 10 May 2025

45dc5a8e-f513-5ba3-aad6-e48bd1d5b563